

王弼老子注

1 章

可道之道，可名之名，指事造形，非其常也，故不可道，不可名也。凡有皆始于无，故未形无名时，则为万物之始，及其有形有名时，则长之育之亭之毒之，为其母也。言道以无形无名始成万物，〔万物〕以始以成而不知其所以〔然〕，玄之又玄也，妙者微之极也。万物始于微而后成，始于无而后生，故常无欲空虚，可以观其始物之妙，微归终也。凡有之为利，必以无为用，欲之所本，适道而后济，故常有欲，可以观其终物之微也。两者始与母也，同出者同出于玄也，异名所施不可同也，在首则谓之始，在终则谓之母，玄者冥（也）默（然）无有也，始母之所出也，不可得而名，故不可言同名曰玄，而言〔同〕谓之玄者，取于不可得而谓之然也，〔不可得而〕谓之然，则不可以定乎一玄而已，〔若定乎一玄〕则是名则失之远矣，故曰玄之又玄也，众妙皆从（同）〔玄〕而出，故曰众妙之门也。

2 章

美者人心之所进乐也，恶者人心之所恶疾也，美恶犹喜怒也，善不善犹是非也，喜怒同根，是非同门，故不可得而偏举也，此六者皆陈自然，不可偏举之（明）〔名〕数也，自然已足，为则败也，智慧自备，为则伪也，因物而用，功自彼成，故不居也，使功在己，则功不可久也。

3 章

贤犹能也，尚者嘉之名也，贵者隆之称也，唯能是任，尚也曷为，唯用是施，贵之何为，尚贤显名，荣过其任，为而常校能相射，贵货过用，贪者竞趣，穿窬探篋，没命而盗，故可欲不见，则心无所乱也，心怀智而腹怀食，虚有智而实无知也，骨无知以干，志生事以乱（心虚则志弱也），守其真也，智者谓知为也。

4 章

夫执一家之量者，不能全家，执一国之量者，不能成国，穷力举重，不能为用，故人虽知万物治也，治而不以二仪之道，则不能赡也，地虽形魄，不法于天则不能全其宁，天虽精象，不法于道则不能保其精，冲而用之，用乃不能穷，满以造实，实来则溢，故冲而用之又复不盈，其为无穷亦已极矣，形虽大不能累其体，事虽殷不能充其量，万物舍此而求主，主其安在乎，不亦渊兮似万物之宗乎，锐挫而无损，纷解而不劳，和光而不污其体，同尘而不渝其真，不亦湛兮似或存乎，地守其形，德不能过其载，天慊其象，德不能过其覆，天地莫能及之，不亦似帝之先乎，帝天帝也。

5 章

天地任自然。无为无造。万物自相治理。故不仁也。仁者必造立施化。有恩有为。造立施化。则物失其真。有恩有为。则物不具存。物不具存。则不足以备载。（矣）[天]地不为兽生刍。而兽食刍。不人为生狗。而人食狗。无为于万物而万物各适其所用。则莫不赡矣。若慧由己树。未足任也。圣人与天地合其德。以百姓比刍狗也。橐排橐也。钥乐钥也。橐钥之中空洞。无情无为。故虚而不得穷屈。动而不可竭尽也。天地之中。荡然任自然。故不可得而穷。犹若 橐钥也。愈为之则愈失之矣。物树其（恶）[慧]。事错其言。[不慧]不济。不言不理。必穷之数也。橐钥而守数中。则无穷尽。弃己任物。则莫不理。若橐钥有意于为声也。则不足以共吹者之求也。

6 章

谷神谷中央无（谷）[者]也。无形无影。无逆无违。处卑不动。守静不衰。（谷）[物]以此成而不见其形。此至物也。处卑（而）[守静]不可得[而]名。故谓[之玄牝]。（天地之根绵绵若存用之不动）。门玄牝之所由也。本其所由。与[太]极同体。故谓之天地之根也。欲言存邪。则不见其形。欲言亡邪。万物以之生。故绵绵若存也。无物不成（用）而不劳也。故曰用而不勤也。

7 章

自生则与物争。不自生则物归也。无私者无为于身也。身先身存。故曰能成其私也。

8 章

人恶卑也。道无水有。故曰几也。言（人）[水]皆应于（治）[此]道也。

9 章

持谓不失德也。既不失其德。又盈之。势必倾危。故不如其已者。谓乃更不如无德无功者也。既揣末令尖。又锐之令利。势必摧衄。故不可长保也。不若其已。不可长保也。四时更运。功成则移。

10 章

载犹处也。营魄人之常居处也。一人之真也。言人能处常居之宅。抱一清神能常无离乎。则万物自宾也。专任也。致极也。言任自然之气。致至柔之和。能若婴儿之无所欲乎。则物全而性得矣。玄物之极也。言能涤除邪饰。至于极览。能不以物介其明。疵（之）其神乎。则终与玄同也。任术以求成运数以求匿者智也。玄览无疵。治国无以智。犹弃智也。能无以智乎。则民不辟而国治也。天门谓天下之所由从也。开阖治乱之际也。或开或阖。经通于天下。故曰天门开阖也。雌应而不（倡）[唱]。因而不为。言天门开阖能为雌乎。则

物自宾而处自安矣。言至明四达。无迷无惑。能无以为乎。则物化矣。所谓道常无为。侯王若能守。则万物〔将〕自化。不塞其源也。不塞其源。则物自生。何功之有。不禁其性。则物自济。何为之恃。物自长足。不吾宰成。有德无主。非玄而何。凡言玄德。皆有德而不知其主。出乎幽冥。

1 1 章

穀所以能统三十辐者无也。以其无能受物之故。故能以（实）〔寡〕统众也。木埴埴所以成三者。而皆以无为用也。言无者有之所以为利。皆頼无以为用也。

1 2 章

爽差失也。失口之用。故谓之爽。夫耳目口心皆顺其性也。不以顺性命。反以伤自然。故曰盲聾爽狂也。难得之货塞人正路。故令人行妨也。为腹者以物养己。为目者以物役己。故圣人不为目也。

1 3 章

宠必有辱。荣必有患。（惊）〔宠〕辱等。荣患同也。为下得宠辱荣患若惊。则不足以乱天下也。大患荣宠之属也。生之厚必入死之地。故谓之大患也。人迷之于荣宠。返之于身。故曰大患若身也。由有其身也。归之自然也。无〔物可〕以易其身。故曰贵也。如此乃可以谄天下也。无物可以损其身。故曰爱也。如此乃可以寄天下也。不以宠辱荣患损易其身。然后乃可以天下付之也。

1 4 章

无状无象。无声无响。故能无所不通。无所不往。不得而知。更以我耳目体不知为名。故不可致诘。混而为一也。欲言无邪。而物由以成。欲言有邪。而不见其形。故曰无状之状无物之象也。不可得而定也。有有其事。无形无名者。万物之宗也。虽今古不同。时移俗易。故莫不由乎此以成其治者也。故可执古之道以御今之有。上古虽远。其道存焉。故虽在今可以知古始也。

1 5 章

冬之涉川。予然若欲度。若不欲度。其情不可得见之貌也。四邻合攻中央之主。犹然不知所趣向者也。上德之人。其端兆不可观。（德）〔意〕趣不可见。亦犹此也。凡此诸若。皆言其容象不可得而形名也。夫晦以理。物则得明。浊以静。物则得清。安以动。物则得生。此自然之道也。孰能物言其难也。除者详慎也。盈必溢也。蔽覆盖也。

1 6 章

言致虚。物之极笃。守静物之真正也。动作成长。以虚静观其反复。凡有起于虚。动起于静。故万物虽并动作。卒复归于虚静。是物之极笃也。各返其

所始。归根则静。故曰静。静则复命。故曰复命也。复命则得性命之常。故曰常也。常之为物。不偏不彰。无皦昧之状。温凉之象。故曰知常曰明也。唯此复。乃能包通万物。无所不容。失此以往。则邪入乎分。则物离其分。故曰不知常则妄作凶。无所包通也。无所不包通。则乃至至于荡然公平也。荡然公平。则乃至至于无所不周普也。无所不周普。则乃至至于同乎天也。与天合德。体道大通。则乃至至于〔穷〕极虚无也。穷极虚无。得道之常。则乃至至于不穷极也。无之为物。水火不能害。金石不能残。用之于心。则虎兕无所投其（齿）〔爪〕角。兵戈无所容其锋刃。何危殆之有乎。

1 7 章

太上谓大人也。大人在上。故曰太上。大人在上。居无为之事。行不言之教。万物作焉而不为始。故下知有之而已。言从上也。不能以无为居事。不言为教。立善行施。使下得亲而誉之也。不复能以恩仁令物。而赖威权也。不能（法）以正齐民。而以智治国。下知避之。其令不从。故曰侮之也。夫御大失性。则疾病生。辅物失真。则疵衅作。信不足焉。则有不信。此自然之道也。已处不足。非智之所（齐）〔济〕也。自然其端兆不可得而见也。其意趣不可得而覩也。无物可以易其言。言必有应。故曰悠兮其贵言也。居无为之事。行不言之教。不以形立物。故功成事遂。而百姓不知其所以然也。

1 8 章

失无为之事。更以施慧立善。道进物也。行术用明。以察奸伪。趣覩形见。物知避之。故智慧出则大伪生也。甚美之名。生于大恶。所谓美恶同门。六亲父子兄弟夫妇也。若六亲自和。国家自和。则孝慈。忠臣不知其所在矣。鱼相忘于江湖之道。则相濡之德生也。

1 9 章

圣智才之善也。仁义（人）〔行〕之善也。巧利用之善也。而直云绝。文甚不足。不令之有所属。无以见其指。故曰此三者以为文而未足。故令人有所属。属之于素朴寡欲。

2 0 章

下篇〔云〕。为学者日益。为道者日损。然则学求益所能。而进其智者也。若将无欲而足。何求于益。不知而中。何求于进。夫燕雀有匹。鸠鸽有仇。寒乡之民。必知旃裘。自然已足。益之则忧。故续凫之足。何异截鹤之胫。畏誉而进。何异畏刑。唯（阿）〔诃〕美恶。相去何若。故人之所畏。吾亦畏焉。未敢恃之以为用也。叹与俗相（返）〔反〕之远也。众人迷于美进。惑于荣利。欲进心竞。故熙熙如享太牢。如春登台也。言我廓然无形之可名。无兆之可举。如婴儿之未能孩也。若无所宅。众\人无有不有怀有志。盈溢胸心。故

曰皆有余也。我独廓然无为无欲。若遗失之也。絶愚之人。心无所别析。意无所（好恶）〔美恶〕。犹然其情不可覩。我颓然若此也。无所别析。不可为（明）〔名〕。耀其光也。分别别析也。情不可覩。无所繫〔執紼〕。以用也。皆欲有所施用也。无所欲为。闷闷昏昏。若无所识。故曰顽且鄙也。食母生之本也。人（者）皆弃生民之本。贵末饰之华。故曰我独欲异于人。

2 1 章

孔空也。惟以空为德。然后乃能动作从道。恍惚无形不繫之叹。以无形始物。不繫成物。万物以始以成。而不知其所以然。故曰恍兮惚兮〔其中有物〕。惚兮恍兮其中有象也。窈冥深远之叹。深远不可得而见。然而万物由之。（其）〔不〕可得见。以定其真。故曰窈兮冥兮其中有精也。信信验也。物反窈冥。则真精之极得。万物之性定。故曰其精甚真其中有信也。至真之极。不可得名。无名则是其名也。自古及今。无不由此而成。故曰自古及今其名不去也。众甫物之始也。以无名（说）。〔阅〕万物始也。此上之所云也。言吾何以知万物之始于无哉。以此知之也。

2 2 章

（不自见〔则〕其明（则）全也）。（不自是则其是彰也）。（不自伐则其功有也）。（不自矜则其德长也）。自然之道亦犹树也。转多转远其根。转少转德其本。多则远其真故曰惑也。少则得其本故曰得也。一少之极也。式犹则（之）也。

2 3 章

听之不闻名曰希。下章言。道之出言。淡兮其无味也。视之不足见。听之不足闻。然则无味不足听之言。乃是自然之至言也。言暴疾美兴不长也。从事谓举动从事于道者也。道以无形无为成济万物。故从事于道者以无为为君。不言为教。绵绵若存。而物得其真。与道同体。故曰同于道。得少也。少则得故曰得也。行得则与得同体。故曰同于得也。失累多也。累多则失。故曰失也。行失则与失同体。故曰同于失也。言随（行）其所〔行〕。故同而应之。忠信不足于下。焉有不信焉。

2 4 章

物尚进则失安。故曰企者不立。〔不自见则其明全也〕。〔不自是则其是彰也〕。〔不自伐则其功有也〕。〔不自矜则其德长也〕。其唯于道而论之。若郤至之行。盛饌之余也。本虽美更可秽也。本有功而自伐之。故更为肮脏者也。

2 5 章

混然不可得而知。而万物由之以成。故曰混成也。不知其谁之子。故先天

地生。寂寥无形体也。无物（之匹）〔匹之〕。故曰独立也。返化终始。不失其常。故曰改也。周行无所不至而（免）〔不危〕殆。能生全大形也。故可以为天下母也。名以定形。混成无形。不可得而定。故曰不知其名也。夫名以定形。字以称可。言道取于无物而不由也。是混成之中。可言之称最大也。吾所以字之曰道者。取其可言之称最大也。责其字定之所由。则繫于大。（大）〔夫〕有繫则必有分。有分则失其极矣。故曰强为之名曰大。逝行也。不守一大体而已。周行无所不至。故曰逝也。远极也。周〔行〕无所不穷极。不偏于一逝。故曰远也。不随于所适。其体独立。故曰反也。天地之性人为贵。而王是人之主也。虽不职大亦复为大。与三匹故曰王亦大也。四大道天地王也。凡者有称有名。则曰其极也。言道则有所由。有所由然后谓之为道。然则（是道）〔道是〕称中之大也。不若无称之大也。无称不可得而名。〔故〕曰域也。道天地王皆在乎无称之内。故曰域中有四大者也。处人主之大也。法谓法则也。人不违地。乃得全安。法地也。地不违天。乃得全载。法天也。天不违道。乃得全覆。法道也。道不违自然。乃得其性〔法自然也〕。法自然者。在方而法方。在圆而法圆。于自然无所违也。自然者无称之言穷极之辞也。用智不及无知。而形魄不及精象。精象不及无形。有仪不及无仪。故转相法也。道（顺）〔法〕自然。天故资焉。天法于道。地故则焉。地法于天。人故象焉。〔王〕所以为主。其（一）〔主〕之者（主）〔一〕也。

2 6 章

凡物轻不能载重小不能鎮大。不行者使行。不动者制动。是以重必为轻根。静必为躁君也。以重为本故不离。不以经心也。轻不鎮重也。失本为丧身也。失君为失君位也。

2 7 章

顺自然而行。不造不（始）〔施〕。故物得至。而无辙迹也。顺物之性。不别不析。故无瑕谪可得其门也。因物之数。不假形也。因物自然。不设不施。故不用关键。绳约而不可开解也。此五者皆言不造不施因物之性不以形制物也。圣人不立形名以检于物。不造进向以殊弃不肖。辅万物之自然而不为始。故曰无弃人也。不尚贤能。则民不争。不贵难得之货。则民不为盗。不见可欲。则民心不乱。常使民心无欲无惑。则无弃人也。举善以（师）〔齐〕不善。故谓之师矣。资取也。善人以善齐不善。〔不〕以善弃不善也。故不善人善人之所取也。虽有其智。自任其智。不因物于其道必失。故曰虽智大迷。

2 8 章

雄先之属。雌后之属也。智为天下之先（也）〔者〕必后也。是以圣人后其身而身先也。溪不求物。而物自归之。婴儿不用智。而合自然之智。式模则

也。忒差也。不可穷也。此三者。言常反终。后乃德全其所处也。下章云反者道之动也。功不可取。常处其母也。朴真也。真散则百行出。殊类生。若器也。圣人因其分散。故为之立官长。以善为师。不善为资。移风易俗。复使归于一也。大制者。以天下之心为心。故无割也。

29章

神无形无方也。器合成也。无形以合。故谓之神器也。万物以自然为性。故可因而不可为也。可通而不可执也。物有常性。而造为之。故必败也。物有往来。而执之。故必失也。凡此诸或。言物事逆顺反复。不施为执割也。圣人达自然之（至）〔性〕。畅万物之情。故因而不为。顺而不施。除其所以迷。去其所以惑。故心不乱而物性自得之也。

30章

以道佐人主。尚不可以兵强于天下。况人主躬于道者乎。为（始）〔治〕者务欲立功生事。而有道者务欲还反无为。故云其事好还也。言师凶害之物也。无有所济。必有所伤。贼害人民。残荒田亩。故曰荆棘生焉。果犹济也。言善用师者。趣以济难而已矣。不以兵力取强于天下也。吾不以师道为尚。不得已而用。何矜骄之有也。言用兵虽趣功（果）济难。然时故不得已（当复）〔后〕用者。但当以除暴乱。不遂用果以为强也。壮武力暴兴。喻以兵强于天下者也。飘风不终朝。骤雨不终日。故暴兴必不道。早已也。

32章

道无形不形。常不可名。以无名为常。故曰道常无名也。朴之为物。以无为心也。亦无名。故将得道。莫若守朴。夫智者可以能臣也。勇者可以武使也。巧者可以事役也。力者可以重任也。朴之为物。愤然不偏。近于无有。故曰莫能臣也。抱朴无为。不以物累其真。不以欲害其神。则物自宾而道自得也。言天地相合。则甘露不求而自降。我守其真性无为。则民不令而自均也。始制谓朴散始为官长之时也。始制官长。不可不立名分以定尊卑。故始制有名也。过此以往。将争锥刀之末。故曰名亦既有夫亦将知止也。遂任名以号物。则失治之母也。故知止所以不始也。川谷之（求）〔与〕江（与）海。非江海召之。不召不求而自归者（世）〔也〕。行道于天下者。不令而自均。不求而自得。故曰犹川谷之与江海也。

33章

知人者智而已矣。未若自知者。越智之上也。胜人者有力而已矣。未若自胜者。无物以损其力。用其智于人。未若用其智于己也。用其力于人。未若用其力于己也。明用于己则物无避焉。力用于己则物改焉。知足〔者〕自不失故富。勤能行之。其志必获。故曰强行者有志矣。以明自察。量力而行。不失其

所。必获久长矣。虽死而以为生之。道不亡乃得全其寿。身没而道犹存。况身存而道不卒乎。

3 4 章

言道泛滥无所不适。过左右上下周旋而用。则无所不至也。万物皆由道而生。既生而不知其所由。故天下常无欲之时。万物各得其所。若道无施于物。故名于小矣。万物皆归之以生。而力使不知其所由。此不为小。故复可名于大矣。为大于其细。图难于其易。

3 5 章

大象天象之母也。〔不炎〕不寒。不温不凉。故能包统万物。无所犯伤。主若执之。则天下往也。无形无识。不偏不彰。故万物得往而不害妨也。言道之深大。人闻道之言。乃更不如学与饵。应时感悦人心也。乐与饵则能令过客止。而道之出言淡然无味。视之不足见。则不足以悦其目。听之不足闻。则不足以娱其耳。若无所中然。乃用之不可穷极也。

3 6 章

将欲除强梁去暴乱当以此四者。因物之性。令其自戮。不假刑为大。以除将物也。故曰微明也。足其张令之足。而又求其张。则众所歛也。与其张之不足。而改其求张者。愈益而已反危。利器利国之器也。唯因物之性。不假刑以理物。器不可覩。而物各得其所。则国之利器也。示人者任刑也。刑以利国则失矣。鱼脱于渊则必见失矣。利国〔之〕器而立刑以示人亦必失也。

3 7 章

顺其自然也。万物无不由为以治以成之也。化而欲作作欲成也。吾将镇之无名之朴。不为主也。无欲竞也。

3 8 章

德者得也。常得而无丧。利而无害。故以德为名焉。何以得德。由乎道也。何以尽德。以无为用。以无为用。则莫不载也。故物无焉则无物不经。有焉则不足以免其生。是以天地虽广以无为心。圣王虽大以虚为主。故曰以复而视。则天地之心见。至日而思之。则先王之至覩也。故灭其私而无其身。则四海莫不瞻。远近莫不至。主其己而有其心。则一体不能自全。肌骨不能相容。是以上德之人。唯道是用。不德其德。无执无用。故能有德而无不为。不求而得。不为而成。故虽有德而无德名也。下德求而得之。为而成之。则立善以治物。故德名有焉。求而得之必有失焉。为而成之必有败焉。善名生则有不善应焉。故下德为之而有以为也。无以为者无所〔偏〕也。凡不能无为而为之者皆下德也。仁义礼节是也。正明德之上下。辄举下德以对上德。至于无以为极下德之量上仁是也。足及于无以为而犹为之焉。为之而无以为。故有为为之患矣。

。本在无为母在无名。弃本舍母。而适其子。功虽大焉必有不济。名虽美焉伪亦必生。不能不为而成不兴而治。则乃为之。故有宏普博施仁爱者。而爱之无所偏私。故上仁为之而无以为也。爱不能兼。则有抑抗正（真）〔直〕而义理者。忿枉佑直。助彼攻此。物事而有以心为矣。故上义为之而有以为也。直不能笃。则有游饰修文礼敬之者。尚好修敬。校责往来。则不对之间忿怒生焉。故上（德）〔礼〕为之而莫之应。则攘臂而扔之。夫大之极也其唯道乎。自此已往岂足尊哉。故虽〔德〕盛业大。富（而）有万物。犹各得其德。〔而未能自周也故天不能为载地不能为覆人不能为赡万物〕虽贵。以无为用。不能舍无以为体也。（不能）舍无以为体。则失其为大矣。所谓失道自后德也。以无为用。〔则〕（德）〔得〕其母。故能己不劳焉而者无不理。下此已往。则失用之母。不能无为而贵博施。不能博施而贵正直。不能正直而贵饰敬。所谓失德而后仁失仁而后义失义而后礼也。夫礼也。所始首于忠信不笃。通简不阳。责备于表。机微争制。夫仁义发于内。为之犹伪。况务外饰而可久乎。故夫礼者忠心之薄而乱之首也。前识者前人而识也。则下德之伦也。竭其聪明以为前识。役其智力以营庶事。虽（德）〔得〕其情奸巧弥密。虽丰其誉愈丧笃实。劳而事昏。务而治蔑（秽）。虽竭圣智而民愈害。舍己任者则无为而泰。守其素朴则不顺典制。（听）〔耽〕彼所获。弃此所守。〔故前〕识者道之华而愚之首。故苟得其为功之母。则万物作焉而不辞也。万物存焉而不劳也。用不以形。御不以名。故（名）仁义可显礼敬可彰也。夫载之以大道。镇之以无名。则物无所尚志无所营。各任其贞事用其诚。则仁德厚焉。行义正焉。礼敬清焉。弃其所载。舍其所正。用其成形。役其聪明。仁则（诚\）〔尚〕焉。义（其）〔则〕竞焉。礼（其）〔则〕争焉。故仁德之厚非用仁之所能也。行义之正非用义之所成也。礼敬之清非用礼之所济也。载之以道。统之以母。故显之而无所尚。彰之而无所竞。用夫无名故名以笃焉。用夫无形故形以成焉。守母以存其子。崇本以举其末。则形名俱有而邪不生。大美配天而华不作。故母不可远。本不可失。仁义母之所生。非可以为母。形器匠之所成。非可以为匠也。舍其母而用其子。弃其本而适其末。名则有所分。形则有所止。虽极其大必有不周。虽盛其美必有患忧。功在为之。岂足处也。

3 9 章

昔始也。一数之始而物之极也。各是一物之生。所以为主也。物皆各得此一以成。既成而舍以居成。居成则失其母。故皆裂发歇竭灭蹶也。各以其一致此清宁灵盈生贞。用一以致清耳。非用清以清也。守一则清不失。用清则恐裂也。故为功之母不可舍也。是以皆无用其功。恐丧其本也。清不能为清。盈不能为盈。故清不足贵盈不足多。贵在其母而母无贵形。贵乃以贱为本。高

乃以下为基。故致数舆乃无也。玉石碌碌珞珞。体尽于形。故不欲也。

4 0 章

高以下为基。贵以贱为本。有以无为用。此其反也。动皆知其所无则物通矣。故曰反者道之动也。柔弱同通。不可穷极。天下之物皆以有为生。有之所始以无为本。将欲全有必反于无也。

4 1 章

有志也。建犹立也。光而不耀。后其身而身先。外其身而身存。黹[土内]也。大夷之道。因物之性。不执平以割物。其平不见。乃更反若黹[土内]也。不德其德。无所怀也。知其白守其黑。大自然后乃得。广德不盈。廓然无形。不可满也。伦匹也。建德者。因物自然。不立不施。故若伦匹。质真者不矜其真故[若]沦。方而不割故无隅也。大器成天下不持然别。故必晚成也。听之不闻名曰希。[大音]不可得闻之音也。有声则有分。有分则不宫而商矣。分则不能统众。故有声者非大也。有形则有分。有分者不温则（炎）[凉]不炎则寒。故象而形者非大象。凡此诸善皆此道之所成也。在象则为大象而大象无形。在音则为大音而大音希声。物以之成。而不见其（成）形。故隐而无名也。贷之非唯供其乏而已。一贷之则足以永终其德。故曰善贷也。成之不如机匠之裁。无物而不济其形。故曰善成。

4 2 章

万物万形其归一也。何由致一。由于无也。由无乃一。一可谓无。已谓之一。岂得无言乎。有言有一。非二如何。有一有二。遂生乎三。从无之有。数尽乎斯。过此以往。非道之流。故万物之生。吾知其主。虽有万形。冲气一焉。百姓有心。异国殊风。而（得一者）王侯[得一者]主焉。以一为主。一何可舍。愈多愈远。损则近之。损之至尽乃得其极。既谓之一犹乃至三。况本不一而道可近乎。损之而益[益之而损]岂虚言也。我之[教人]非强使（人）从之也。而用夫自然。举其至理。顺之必吉。违之必凶。故人相教。违之[必]自取其凶也。亦如我之教人勿违之也。

4 3 章

气无所不入。水无所不（出于）经。虚无柔弱。无所不通。无有不可穷。至柔不可折。以此推之故知无为之有益也。

4 4 章

尚名好高。其身必疏。食货无厌。其身必少。得多利而亡其身。何者为病也。甚爱不与物通。多藏不与物散。求之者多。攻之者众。为物所病。故大费厚亡也。

4 5 章

随物而成。不为一象。故若缺也。大盈（冲）〔充〕足。随物而与。无所爱矜。故若冲也。随物而直。直不在一。故若屈也。大巧因自然以成器。不造为异端。故若拙也。大辩因物而言。己无所造。故若讷也。躁罢然后胜寒。静无为以胜热。以此推之则清静为天下正也。静则全物之真。躁则犯物之性。故惟清静乃得如上诸大也。

4 6 章

天下有道。知足知止。无求于外。各修其内而已。故却走马以治田粪也。贫欲无厌。不修其内。各求于外。故戎马生于郊也。

4 7 章

事有宗而物有主。途虽殊而（同）〔其〕归〔同〕也。虑虽百而其致一也。道有大常。理有大致。执古之道可以御今。虽处于今可以知古始。故不出户窥牖而可知也。无在于一而求之于众也。道视之不可见。听之不可得。抟之不可得。如其知之不须出户。若其不知出愈远愈迷也。得物之致。故虽不行而虑可知也。识物之宗。故虽不见而是非之理可得而名也。明物之性因之而已。故虽不为而使之成矣。

4 8 章

务欲进其所能益其所习。务欲反虚无也。有为则有所失。故无为乃无所不为也。动常因也。自己造也。失统本也。

4 9 章

动常因也。各因其用则善不失也。无弃人也。各用聪明。皆使和而无欲如婴儿也。夫天地设位圣人成能人谋鬼谋百姓与能者。能者与之资者取之。能大则大资贵则贵。物有其宗事有其主。如此则可冕旒充目而不惧于欺。黠纡塞耳而无戚于慢。亦何为劳一身之聪明。以察百姓之情哉。夫以明察物物亦竞以其明（应）〔避〕之。以不信（察）〔求〕物物亦竞以其不信应之。夫天下之心不必同。其所应不敢异。则莫肯用其情矣。甚矣害之大也。莫大于用其明矣。夫（在）〔任〕智则人之讼。（在）〔任〕力则人与之争。智不出于人而立乎讼地则穷矣。力不出于人而立乎争地则危矣。未有能使人无用其智力（乎）〔于〕己者也。如此则己以一敌人而人以千万敌己也。若乃多其法网烦其刑罚塞其径路攻其幽宅。则万物失其自然百姓丧其手足。鸟乱于上鱼乱于下。是以圣人之于天下歛歛焉心无所主也。为天下浑心焉意无所适莫也。无所察焉百姓何避。无所求焉百姓何应。无避无应则莫不用其情矣。人无为舍其所能而为其所不能。舍其所长而为其所短。如此则言者言其所知行者行其所能。百姓各皆注其耳目焉。吾皆孩之而已。

5 0 章

出生地入死地。十有三犹云十分有三。取其生道全生之极十分有三耳。取死之道全死之极亦十分有三耳。而民生之厚。更之无生之地焉。全摄生者无以生为生。故无死地也。器之害者莫甚乎（戈兵）〔兵戈〕。兽之害者莫甚兕虎。而令兵戈无所容其锋刃。虎兕无所措其爪角。斯诚不以欲累其身者也。何死地之有乎。夫蜷蟪以渊为浅而凿穴其中。鹰鹯以山为卑而增巢其上。罾缴不能及网罟不能到。可谓处于无死地矣。然而卒以甘饵乃入于无生之地。岂非生生之厚乎。故物苟不求离其本不以欲渝其真。虽入军而不害。陆行而不（可犯）〔犯可〕也。赤子之可则而贵信矣。

5 1 章

物生而后畜。畜而后形。形而后成。何由而生道也。何得而畜德也。何（由）〔因〕而形物也。何使而成势也。唯因也故能无物而不形。唯势也故能无物而不成。凡物之所以生。功之所以成。皆有所由。有所由焉则莫不由乎道也。故推而极之亦至道也。随其所因故各有称焉。道者物之所由也。德者物之所得也。由之乃得故（曰）不得不（失）〔尊〕。（尊）〔失〕之则害〔故〕不得不贵也。（命并作爵）。〔亨谓品其形毒〕谓成其（实）〔质〕。各得其庇荫。不伤其体矣。为而不有。有德而不知其主也。出乎幽冥。（是以）〔故〕谓之玄德也。

5 2 章

〔善始之则善养畜之矣故天下有始则可以为天下母矣〕。母本也。子末也。得本以知末。不舍本以逐末也。兑事欲之所由生。门事欲之所从也。无事永逸故终身不勤也。不闭其原而济其事。故虽终身不救。为治之功不在大。见大不明见小乃明。守强不强守柔乃强也。显道以去民迷。不明察也。道之常也。

5 3 章

言若使我可介然有知。行大道于天下。唯施为（之）是畏也。言大道荡然正平。而民犹尚舍之而不由。好从邪径。况复施为以塞大道之中乎。故曰大道甚夷而民好径。朝宫室也。除洁好也。朝甚除则田甚芜食甚虚。设一而众害生也。凡物不以其道得之则皆邪也。邪则盗也。夸而不以其道得之。〔盗夸也贵而不以其道得之〕窃位也。故举非道以明。非道则皆盗夸也。

5 4 章

固其根而后营其末。故不拔也。不贫于多。齐其所能。故不脱也。子孙传此道。以祭祀则不辍也。以身及人也。修之身则真。修之家则有余。修之不废。所施转大。彼皆然也。以天下百姓心观天下之心也。天下之道。逆顺吉凶。亦皆如人之道也。此上之所云也。言吾何以得知天下乎。察己以知之。不求于外也。所谓不出户以知天下者也。

5 5 章

赤子无求无欲不犯众物。故毒（虫）〔螫〕之物无犯（之）〔于〕人也。含德之厚者不犯于物。故无物以损其全也。以柔弱之故故握能周固。作长也。无物以损其身故能全长也。言含德之厚者无物可以损其德渝其真。柔弱不争而不摧折。皆若此也。无争欲之心。故终日出声而不嘎也。物以和为常。故知和则得常也。不皦不昧不温不凉此常也。无形不可得而见。〔故曰知常〕曰明也。生不可益。益之则夭也。心宜无有使气则强。

5 6 章

因自然也。造事端也。含守质也。除争原也。无所特显则物无所偏争也。无所特贱则物无所偏耻也。可得而亲则可得而疎也。可得而利则可得而害也。可得而贵则可得而贱也。无物可以加之也。

5 7 章

以道治国则国平。以正治国则奇（正）〔兵〕起也。以无事则能取天下也。上章云。其取天下者。常以无事。及其有事。亦不足以取天下也。故以正治国则不足以取天下治以奇用兵也。夫以道治国崇本以息末。以正治国立辟以攻末。本不立而末浅。民无所及。故必至于〔以〕奇用兵也。利器凡所以利己之器也。民强则国家弱。民多智慧则巧伪生。巧伪生则邪事起。立正欲以息邪而奇兵用。多忌讳欲以耻贫而民弥贫。利器欲以强国者也而国愈昏（多）〔弱〕。皆舍本以治末故以致此也。上之所欲民从之则也。我之所欲唯无欲。而民亦无欲而自朴也。此四者崇本以息末也。

5 8 章

言善治政者无形无名无事无政可举。闷闷然卒至于大治。故曰其政闷闷也。其民无所争竞。宽大淳淳也。故曰其民淳淳也。立刑名明赏罚以检奸伪。故曰〔其政〕察察也。殊类分析。民怀争竞。故曰其民缺缺。言谁知善治之极乎。唯无可正举。无可形名。闷闷然而天下大化此其极也。以正治国则便复以奇用兵也。故曰正复为奇。立善以和万物则便复有妖之患也。言人之迷惑失道固久矣。不可便正善治以责。以方导物。（舍）〔令〕去其邪。不以方割物。所谓大方无隅。廉清廉也。剝伤也。以清廉（清）〔导入〕民。（令去其邪）令去其污。不以清廉剝伤于物也。以直导物令去其僻。治不以直激（沸）〔拂〕于物也。所谓大直若屈也。以光鉴其所以迷。不以光照求其隐匿也。所谓明道若昧也。此皆崇本以息末。不攻而使复之也。

5 9 章

莫若犹莫过也。嗇农夫。农人之治田务去其殊类。归于齐一也。全其自然。不急其荒病。除其所以荒病。上承天命下绥百姓莫过于此。早服常也。唯重

积德不欲营速。故曰早服谓之重德者也。道无穷也。以有穷而莅国非能有国也。国之所以安谓之母。重积德是唯图其根。然后营末。乃得其终也。

6 0 章

不扰也。躁则多害静则全真。故其国弥大而其主弥静。然后乃能广得众心矣。治大国则若烹小鲜。以道莅天下则其鬼不神也。神不害自然也。物守自然则神无所加。神无所加则不知神之为神也。道洽则神不伤人。神不伤人则不知神之为神。道洽则圣人亦不伤人。圣人不伤人则〔亦〕不知圣人之为圣也。犹云〔非独〕不知神之为神。亦不知圣人之为圣也。夫恃威网以使物者治之衰也。使不知神圣之为神圣道之极也。神不伤人圣人亦不伤人。圣人不伤人神亦不伤人。故曰两不相伤也。神圣合道交归之也。

6 1 章

江海居大而处下则百川流之。大国居大而处下则天下流之。故曰大国〔者〕下流。天下〔之〕所归会〔者〕也。静而不求。物自归之也。以其静故能为下。牝雌也。雄躁动贪欲。雌常以静故能胜雄也。以其静复能为下故物归之也。大国以下犹云以大国下小国。小国则附之。大国纳之也。言唯修卑下然后乃各得其所〔欲〕。小国修下自全而已。不能令天下归之。大国修下则天下归之。故曰各得其所欲则大者宜为下也。

6 2 章

奥犹暖也。可得庇荫之辞。宝以为用也。保以全也。言道无所不先。物无有贵于此也。虽有珍宝璧马无以匹之。美言之则可以夺众货之贾。故曰美言可以市也。尊行之则千里之外应之。故曰可以可于人也。不善当保道以免放。言以尊行道也。此道上之所云也。言故立天子置三公尊其位重其人所以为道也。物无有贵于此者。故虽有抱宝璧以先驷马而进之不如坐而进此道也。以求则得求以免则得免。无所而不施故为天下贵也。

6 3 章

以无为为居。以不言为教。以恬淡为味。治之极也。小怨则不足以报。大怨则天下之所欲诛。顺天下之所同者德也。以圣人之才犹尚难于细易。况非圣人之才而欲忽于此乎。故曰犹难之也。

6 4 章

以其安不忘危。谋之无功之势。故曰易也。虽失无入有。以其微脆之故。未足以兴大功。故易也。此四者皆说慎终也。不可以无野故而持。不可以微之故而弗散也。无而弗持则生有焉。微而不散则生大焉。故虑终之患如始之祸。则无败事。谓其安未兆也。谓〔闭〕微脆也。当以慎终除微。慎微除乱。而以施为治之。形名执之。反生事原。巧辟滋作。故败失也。不慎终也。好

欲虽微争尚为之兴。难得之货虽细贫盗为之起。不学而能者自然也。喻于学者过也。故学不学以复众\人之〔所〕过。

6 5 章

明谓多（见）〔智〕巧诈蔽其朴也。愚谓无知守真顺自然也。多智巧诈故难治也。智犹治也。以智而治国。所以谓之贼者。故谓之智也。民之难治。以其多智也。当务塞兑闭门。令无知无欲。而以智术动民。邪心既动。复以巧术防民之伪。民知其术。（防随）〔随防〕而避之。思惟密巧。奸伪益滋。故曰以智治国国之贼\也。稽同也。今古之所同则不可废。能知稽式是谓玄德。玄德深矣远矣。反其真也。

6 7 章

久矣其细犹曰其细久矣。肖则失其所以为大矣。故曰若肖久矣其细也夫。夫慈以陈则胜以守则固。节俭爱费天下不匮故能广也。唯后外其身。为物所归。然后乃能立成器为天下利。为物之长也。且犹取也。相勉而不避于难故胜也。

6 8 章

士卒之帅也。武尚先陵人也。后而不先。应而不唱。故不在怒。（不）与争也。用人而不为之下。则力不为用也。

6 9 章

（彼）〔进〕遂不止。行谓行陈也。言以谦退爱慈。不敢为物先。用战犹行无行。攘无臂。执无兵。扔无敌也。言无有与之抗也。言吾哀慈谦退。非欲以取强无敌于天下也。不得已而卒至于无敌。斯乃吾之所以为大祸也。宝三宝也。故曰几亡吾宝。抗举也。（加）〔若〕当也。哀者必相惜而不趣利避害故必胜。

7 0 章

可不出户窥牖而知。故曰甚易知也。无为而成。故曰甚易行也。惑于躁欲。故曰莫之能知也。明于荣利。故曰莫之能行也。宗万物之（宗）〔主〕也。万（物）〔事〕之主也。以其言有宗。事有君之故。故有知之人。不得不知之也。唯深故知之者希也。知我益希。我亦无匹。故曰知我者希则我（者）贵也。被褐者同其尘。怀玉者宝其真也。圣人之所以难知。以其同尘而不殊。怀玉而不渝。

7 1 章

故难知而为贵也。不知知之不足任则病也。

7 2 章

清（净）〔静〕无为谓之居。谦后不盈谓之生。离其清（净）〔静〕。行

其躁欲。弃其谦后。任其威权。则物扰而民弹僻。威不能复制民。民不能堪其威。则上下大溃矣。天诛将至。故曰民不畏威则大威至。无狎其所居。无厌其所生。言威力不可任也。不自厌也。不自厌是以天下莫之厌。不自见其所知。以耀光行威也。自贵则（物）〔将〕狎（厌居）〔居厌〕生。

7 3 章

必不得其死也。必齐命也。俱勇而所施者异。利害不同。故曰惑利惑害也。孰谁也。言谁能知天（天下之所恶）意（故）邪。其唯圣人〔也〕。夫圣人之明。犹难于勇敢。况无圣人之明而欲行之也。故曰犹难之也。（天）〔夫〕唯不争。故天下莫能与之争。顺则吉逆则凶。不言而善应也。处下则物自归。垂象而见吉凶。先事而设诚。安而不忘危。未（召）〔兆〕而谋之。故曰繻（弹）然而善谋也。

7 4 章

诡异乱羣谓之奇也。为逆顺者之所恶忿也。不仁者人之所疾也。故曰常有司杀也。

7 6 章

强兵以暴于天下者物之所恶也。故必不得胜。物所加也。木之本也。枝条是也。

7 7 章

与天地合德。乃能包之如天之道。如人之量则各有其身。不得相均。如惟无身无私乎。自然然后乃能与天地合德。言（唯）〔谁〕能处盈而然虚。损有以补无。和光同尘。荡而均者。唯（其）〔有〕道〔者〕也。是以圣人不欲示其贤。以均天下。

7 8 章

以用也。其谓水也。言用水之柔弱无物可以易之也。

7 9 章

不明理其契。以致大怨已至。而德〔以〕和之。其伤不复。故〔必〕有余怨也。左契防怨之由生也。有德之人。念思其契。不（念）〔令〕怨生而后责于人也。彻司人之过也。

8 0 章

国既小。民又寡。尚可使反古。况国大民众乎。故举小国而言也。言使民虽有什伯之器。而无所用。何患不足也。使民不用。惟身是宝。不贪货赂。故各安其居。重死而不远徙也。无所欲求。

8 1 章

实在质也。本在朴也。极在一也。无私而有。唯善是与。任物而已。物所

尊也。物所归也。动常生成之也。顺天之利不相伤也。